

REGIONAL NEWS BULLETIN

HEADLINES (EVENING)

Date – 12/06/2025

Time - 18:30 -18:40Hrs

- Mizoram chu ram pum huapa a thlawna thisen pe tha zual zingah a tel mek .
- Chakma Autonomous District Council huamchhunga tlawmngai pawl 3 te chuan CADC chu thla 6 chhung Governor Rule ah dah turin Larsap Gen (Retd) VK Singh a hnenah an thlen.
- Ahmedabad atanga London pana thlawk chhuak Air India thlawhna AI-171 chu vawiin chawhnu khan a chesual.
- President Drouapdi Murmu, Prime Minister Narendra Modi leh ram hruaitu dangten vawiina Air India thlawhna chesual chu pawl an tih thu an sawi.

<><><>

BLOOD DONATION

Mizoram chu ram pum huapa a thlawna thisen pe tha zual zingah a tel mek a, kum 2007 atang khan India state leh UT zingah Mizoram chu a thlawna thisen pek ti tha zual 10 zingah a tel chho zel a ni.

Akashvani News zawhna chhangin, Association for Voluntary Blood Donation,(AVBD) Vice President Pu K Zothanpara chuan India ram pumah thisen pe tha ber state hriat theih ni chiah lo mah se, Mizoram chu a pe tha ber emaw a dawttu a nih a rin thu sawiin, National AIDS Control Organisation (NACO)-in a tarlan danin, kum 2007 atang khan India state leh UT zingah Mizoram chu a thlawna thisen pek ti tha zual 10 zingah a tel ve zel tawh thu leh hmarchhak bial bikah pheichuan a ti tha ber pawl a nih reng thu a sawi a, nikum October ni 1, National Voluntary Blood Donation Day-ah khan Rajasthan khawpui Jaipur-a India Blood Donation NGO Conclave-ah Ministry of Health & Family Welfare leh National Blood Transfusion Council chuan Mizoram chu India hmarchhak state zinga a thlawna thisen pe tam ber chawimawina a lo hlan tawh a ni.

Kumin chhunga Mizorama thisen pek tawh zat hriat theih ni rih lo mahse, MSACS Blood Safety Division data thar berah chuan nikum 2024 April thla atanga kumin March thla thleng khan Mizoram pumah thisen unit 34,752 pek a ni a, chung zinga unit 32,566 chu pek bik nei loa a thlawna pek, voluntary donation a ni a. A thlawna thisen pek zawng zawng hi zaah 93.71 a tling a. Lunglei Civil Hospital chu hemichhunga thlawna thisen pek tam berna niin, a thlawna thisen pek zat chu zaa 99.87 a tling a. Christian Hospital, Serkawn in dawtin zaa 98.04, Synod Hospital, Durtlang ah zaa 97.71, Serchhip District Hospital ah zaa 97.67, Siaha District Hospital ah zaa 96.88, Champhai District Hospital ah zaa 95.11, Kolasib District Hospital ah zaa 93.85, Civil Hospital, Aizawl ah zaa 93.43, Mamit District Hospital ah zaa 92.31, Lawngtlai District Hospital ah zaa 75.27 te a ni.

Mizorama a thlawna thisen pe tam ber, Pu C. Lalremruata chuan kum 1998 atanga tun thla June ni 10 thleng khan a thlawnin thisen vawi 96 a pe tawh tih sawiin, zing thawh hma, tui in that leh mut that chu thisen a pek theihna atana a taksa tichaktu ni a hriat thu a sawi a, dam lo tam tak thisen mamawh an tam avangin a thlawna thisen pek kawngah hmasawn tul a tih thu a sawi a, Mizo thalaite chu an hrisel phawt chuan a mamawhtute tan thisen pe thin turin a chah a ni.

Kumtina hman thin World Blood Donor Day chu June ni 14-ah hman thin ni mah se kuminah hian Inrinni, sorkar chawlhah a tlak avangin Mizoramah chuan naktuk, Zirtawpni khian AVBD leh MSACS huaihawtin Dawrpui Multipurpose Centre, Aizawlah hman a ni dawn a ni.

PAC VISIT

Mizoram Legislative Assembly-a Public Accounts Committee (PAC) te chuan Siaha District Court leh District Hospital-te vawiin khan an tlawh a,

Public Accounts Committee-te hi an Chairman, Pu Lalchhamdama Ralte, Leader of Opposition chuan a kaihrui a, Public Accounts Committee Member- Pu TBC Lalvenchhunga, Adviser to Chief Minister (Finance & Planning), Pu C. Ngunlianchung, MLA, Dr K. Beichhua, MLA, Pu V.L. Zaithanzama MLA leh Lt. Col. Clement Lalhmingthanga MLA te an tel a, anni bakah sorkar official te pawh an tel a ni.

Nimin chawhnu khan Lawngtlai District Court leh District Hospital chu chu tlawhin, an dinhmun an zirchiang a, hemi hnu hian an thil hmuh dan report an buatsaih zui ang.

<><><>

CADC

Chakma Autonomous District Council huamchhunga tlawmngai pawl 3 te chuan CADC chu thla 6 chhung Governor Rule ah dah turin Larsap Gen (Retd) VK Singh a hnenah an thlen,

Young Chakma Association (YCA), Mizoram Chakma Students' Union (MCSU), leh Chakma Mahila Samiti te hian memorandum siamin CADC buaina a thuk hle tih an sawi a, tunah hian sorkarna inthlakthlengna thleng leh mai tur khawpin boruak a inmun mek an ti a ni.

Term hmasa khan CADC ah vawi 5 sorkar a inthlak a, tun term ah hian vawi 2 inthlak leh tawhin, tunah pawh politics boruak a inlumlet leh mek a, hei hi MDC te chu chan tha zawk chang tur leh hnalak naah pawh duhsak an nih tur thu a thlem an nih thin vang a ni an ti a, Governor chu inrawlh thuai se an ti a ni.

Hei bakah hian CADC sum dinhmun chu a chhe hle an ti a, thla 4 chhung sorkarin hlawh a pe tawh loa, kumin sorkar kum kalmekah hian thla 8 vel chu bathlaua kal tur ni a rinlawk a nih thu an sawi a, dan lova hnalak hrang hrang te chuan sum leh pai dinhmun hi a tichhe zual a ni an ti bawk a ni.

An memorandum a an tarlan danin, dan lova sorkar hna pek hi 200 a chuang a, hei hi kum 2022 hnua lak te niin hemi chungchang pawh hi chhui chian ngei a ngai a ni an ti.

<><><>

KOLASIB VKSA

Thla kalta May ni 29 a tan Kolasib District chhunga Vikshit Krishi Sankalp Abhiyan (VKSA) Pre- Kharif campaign chu vawiin khan Kolasiba KVK Conference Hall ah khar ani.

Vikshit Krishi Sankalp Abhiyan Campaign hi kuthnathawktu ten an hmalakna ah sorkarin hamthatna a siam sak te leh technology thar tha tak tak hman tangkai turte inhrilhhriatna hun niin, Kolasib District ah chuan May ni 29 atang khan he campaign hi neih tan ani a, ruah sur nasa avangin ni hnih chhung Campaign hi chawlh lailawk anih hnu in tluang takin kalpui leh anih hnu in vawiin ah kharna hun hman ani.

VKSA Campaign hun chhung hian Agriculture Deptt hnuaia line hrang hranga mithiam te chu team pathum (3) ah in sem in, Kolasib District chhunga khaw 60 ah an an feh chhuak ani.

Vawiin a Vikshit Krishi Sankalp Abhiyan Pre- Kharif Campaign (VKSA) kharna hun Pu PC Lalrintluanga, Subject Matter Specialist (Horti.) chuan kaihrui in, Dr. Michelle C. Lallawmkimi, Senior Scientist & Head, KVK Kolasib chuan Campaign report a pe a, Department hrang hrang leh training team hrang hrang te hnen atangin Campaign chungchanga a an hun hman dan report an pe bawk.

He hun ah hian kuthnathawktute tana thil pawimawh chi hrang hrangte sawi ho nghal in, Campaign lai a sorkar Department hrang hrang- DC, DRDO, DAO, DHO, DFDO, BDO leh Irrigation Department a expert member te an tel ani.

<><><>

UPSE PRELIMS

Union Public Service Commission (UPSC) hnuai Civil Service Examination (CSE), 2025 Preliminary result-ah Aizawl Exam centre atangin mi 8 an tling.

Nimin tlai khan UPSC Civil Service Exam Preliminary result hi tihchhuah a ni a, hriat theih chinah Aizawl Exam centre atangin mi 8- KC Zalena, Lalfakzuala, Lalremsiama Darchhun, Liansonjem Dousel, Lalremsiami, Lalrinpuia, Vanlalawmpuia, leh hnam dang pakhat, Siddharaj te an tling a ni.

UPSC 2025 Preliminary Exam hi kumin May ni 25 khan neih A NI A, ram pumah candidate nuai 10 velin exam hi an hmachhawn a, result hi UPSC website, upsc.gov.in-ah a en theih a, candidate sing 1, sang 4,161 Prelims paltlang te chuan August ni 22 khian Civil Services (Main) Examination an hmachhawn leh dawn a, Main Exam paltlang te chuan interview an hmachhawn leh dawn a, heta tang hian All-India Service leh Central civil service hrang hrangah thlan thin an ni a. Interview neih hun tur erawh tihchhuah a la ni lo thung.

Nikum 2024 UPSC Preliminary exam-ah khan Aizawl Exam Centre atangin mi 3 an tling a. Zohnathlak ang chuan mi 18 an tling thung a, final ah erawh tling pakhat chiaah a awm a, Jerry Lalhratthang Buongpui S/o Upa BK Buongpui, Shillong chu UPSC CSE Final Result 2024 result chhuakah khan a hlawhtling a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

AIR INDIA

Ahmedabad atanga London pana thlawk chhuak Air India thlawhna AI-171 chu vawiin chawhnu khan a chesual a, tun dinhmunah thi leh hliam zat hriat ala ni lo. Thudawn danin thlawhnaah hian pilot 2 leh thawktu 10 tiamin mi 242 an chuang a.

Ahmedabad Airport atanga a thlawhchhuah hnu reiloteah airport kianga mihring chenna Meghani Nagar-ah a tla a. Thlawhnaa chuang zingah hian India mi 169, British mi 53, Canadian pakhat leh Portuguese 7 an chuang a. Vanduaina thlenna hmunah hian police leh kangthelhtute rang takin an thleng nghal a. Heng bakah hian mi 90 awmna National Disaster Response Force (NDRF) team 3 Gandhinagar atangin tirh nghal an i a. Vadodara atangin team dang 3 tirh belh an ni bawk a ni. Thlawhna tlak chhan hi tihchian theih ala ni lo a. Thlawhna chesualah hian Gujarat Chief Minister hlui Vijay Rupani pawh a chuang ve nia thudawn a ni.

<><><>

PRESIDENT, PM & LEADER OF OPPOSTION ON PLANE CRASH

President Drouapdi Murmu-I chuan vawiina Air India thlawhna chesual chuan a thawng takzet thu leh pawl atih thu social media kaltlangin a sawi. Pi Murmu-I chuan vanduaina tawh zawng zawngte a tawngtaipui thu sawiin rampumin an tawrhpu thu a sawi a ni.

Prime Minister Narendra Modia pawhin vawiina Air India thlawhna chesual chu pawl atih thu a sawi. Social Media-ah he thu hi tarlangin Pu Modia chuan thlawhna chesual chuan a thawng takzet a ti a. Minister leh thuneitute nen an inbiak pawh reng thu sawiin he vanduaina tuartute chhawmdawl hna chak takin an thawk tih a sawi.

PM Modia hian thlawhna chetsual hnu hian Union Home Minister Amit Shah leh Union Civil Aviation Minister Ram Mohan Naidu te a be nghal

a. Chhiatna thlen dan kimchang a zawtin vanduaina tawkte tanpui leh chhanchhuah danah a tul angin chak taka hmala turin a ti a ni.

Union Home Minister Amit Shah-a chuan Ahmedabad-a thlawhna chesual chu pawl a tih thu social media ah a sawi a. Pu Shaha chuan vanduaina thlenna hmunah hian disaster response force te rang taka tirhlul nghal an ni a ti a. Gujarat Chief Minister Bhupendra Patel, State Home Minister harsh Sanghavi leh Police Commissioner te pawh a biak nghal thu a sawi a ni.

Congress hruaitu leh Lok Sabha Opposition Leader Rahul Gandhi pawhin Air India thlawhna Ahmedabada chesual chuan a thinlung a tih nat thu social media kaltlangin a sawi a. Pu Gandhi chuan thlawhnaa chuang chhungte rilru na leh hreawmna chu ngaihtuah phak anih loh thu a sawi a. He vanduaina tuartute zawng zawng a tawrhpu takzet thu a sawi a ni.

Mizoram Governor General (Rtd) V K Singh leh Chief Minister Pu Lalduhoma bakah Union Health Minister JP Nadda, External Affairs Minister Dr.S.Jaishankar leh hruaitu hrang hrangten Ahmedabad-a Air India thlawhna chesual pawl an tih thu social media lamah an tarlang bawh a ni.

<><><>